

NAQQIUT

Akissuteqaat 15. november 2024-imeersoq taarserpaa

(Kalaallisuunngorlugu nutsernerani kukkunerit iluarsineqarput, piginnittuunermut piumasaqaatit allanngortinneqarlutik kiisalu akiliisitsisarnermut aalajangersakkami annikitsumik mianersuaalliornermi pineqaatissiinissamut periarfissaq ilanngunneqarluni).

Uunga

allannguutissatut siunnersuut

Uunga siunnersuut: Takornariartitsinermit, sumiiffinni nunami aalajangersimasuni zone-nut agguasaarneq il.il. inuussutissarsiuutigalugu ingerlatsinermi aammalu killeqartumik sumiiffiit ilaanni angalaarsinnaaneq pillugit Inatsisartut inatsisaat

Pingajussaarinninnermi Naalakkersuisunit saqqummiunneqartoq.

Siunnersuutip qulequtaanut

1. Siunnersuutip qulequtaa ima oqaasertaliorneqassaaq:

”Uunga siunnersuut:

Takornariartitsinermit ingerlataqarneq aamma inuussutissarsiuutigalugu ingerlatsinermizonenut immikkoortiterineq il.il. pillugit Inatsisartut inatsisaat”

§§ 1-imiit 18 ilanngullugu allannguutinut

2. §§ 1-imiit 18 ilanngullugu ima oqaasertaliorneqassapput:

“Kapitali 1

Atuuffia aamma nassuiaatit

§ 1. Takornariartitsinermit ingerlataqarnermut Inatsisartut inatsisaat atuuppoq.

Imm. 2. Inuussutissarsiuutigalugu sulinermit Inatsisartut inatsisaat aammattaaq atuutissaaq.

Imm. 3. Ingerlatanut sumiiffinninunami aalajangersimasuni takornariartitsinermit akuersissuteqartarnissaq pillugu Inatsisartut inatsisaat naapertorlugu akuersissutini ilaatinneqartunut Inatsisartut inatsisaat atuutinngilaq.

Imm. 4. Inunnut imaluunniit inatsisitigut pisinnaatitaasunut pisussaataasunullu, Kalaallit Nunaannut imaluunniit Kalaallit Nunaannit imaluunniit Kalaallit Nunaanni inunnik angallassinermik

suliaqartunut, tassunga atatillugu takornariartitsinermik ingerlataqarneq suliarineqarani, Inatsisartut inatsisaat atuutinngilaq, taamaattoq § 15 takuuk.

Imm. 5. Inuussutissarsiutit inatsisartut inatsisaannit matuminnga ilaatinneqartussaannngitsut pillugit Naalakkersuisut aalajangersakkanik erseqqinnerusunik aalajangersaasinnaapput.

§ 2. Inatsisartut inatsisaanni matumani takornariartitsinermik ingerlataqarneq ima paasineqassaaq, pingaarnertut takornarianut aningaasaqarnikkut ingerlatsinerit ingerlatsinerillu allat, Kalaallit Nunaanni misigisaqartitsinissamik iluseqartumik sullissinermik neqerooruteqarnissamik siunertaqartut, aamma ima tuniniarneqartut:

- 1) ulloq naallugu angallassinertit unnuinertaqanngitsut, aamma
- 2) angallassinertit ullunik arlalinnik sivisussuseqartut.

Imm. 2. Inatsisartut inatsisaanni matumani takornarialerisutut paasineqassaaq inuk imaluunniit inatsisitigut pisinnaatitaasoq pisussaataasorlu, § 3, imm. 1 malillugu takornarialerinerimik ingerlataqarnissamut akuersissummik atuuttumik pilik.

Imm. 3. Inatsisartut inatsisaanni matumani takornariatut paasineqassaaq inuk, inuup nalinginnaasumik najugaqarfigisami imaluunniit najukkami avataanut sumiiffimmut angalasoq, aamma angalaneq tamarmi imaluunniit angalanerup ilaa nuannisaarnissaq, peqqissarnissaq imaluunniit sulinnigiffeqarnissaq eqqarsaatigalugu pisoq, aamma tassunga atatillugu sullissinernik imm. 1-imi ilaatinneqartunik pissarsisoq.

Kapitali 2

Takornarialerinerimik ingerlataqarnissamut akuersissut

§ 3. Imm. 2 malillugu takornariartitsinermik ingerlataqarneq taamaallaat akuersissummik atuuttumik pigisalimmit suliarineqassaaq.

Imm. 2. Inunnut imaluunniit inatsisitigut pisinnaatitaasumut pisussaataasumullu, §§ 7-miit 10 ilanngullugu malillugit piumasaqaatinik naammassinnittunut, Naalakkersuisut akuersissutinik atulersitsissapput. Takornariartitsinermik ingerlataqarnissamut t akuersissut, tamanna immikkut ittumik pissutsit pissutissaqartippassuk, piffissamut aalajangersimasumut killilerlugu atulersinneqarsinnaavoq.

Imm. 3. Akuersissutip atuuffiani tamarmi, §§ 7-imiit 10 ilanngullugu piumasaqaatit takornariartitsisup naammassissavai. Takornariartitsisup piumasaqaatit naammassinngippagit, inatsisartut inatsisaanni § 14, imm. 1 malillugu takornariartitsisoq naalakkiummik atulersitsivigineqarsinnaavoq. Isumannaallisaaneq pillugu eqqarsaatigisassat suliarineqarnissaannut aamma uumasut pinngortitamilu sumiiffiit aalajangersimasut qajassuunneqarnissaannut, takornariartitsinermik ingerlataqarnissamut akuersissutip piffissami atuuffiani ilutsit aalajangersimasut suliarinissaannut, malittarisassani piumasaqaatinik amerlanerusunik, takornarialerisup naammassisassanik, Naalakkersuisut aalajangersaasinnaapput.

Imm. 4. Takornariartitsinermik ingerlataqarnissamut akuersissut, Naalakkersuisunit allakkatigut akuersissuteqarnikkut allanut tunniunneqarsinnaavoq.

Imm. 5. Takornariartitsinermik ingerlataqarnissamut akuersissutit Naalakkersuisut tamanut saqqummiussinavaat.

Imm. 6. Takornarialerisumi takornariartitsinermik ingerlataqarnermit 1-mit arlalinnilluunniit aningaasatigut kaaviiartitsineq katillugu ukiumut 50.000 kr.-it qaanginnippagit, imm. 1 apeqqutaatinnagu akuersissuteqarnissamik piumasagaat atuuppoq.

§ 4. Suliniutit inatsisartut inatsisaanni aamma takornariartitsinermik ingerlataqarnissamut akuersissutit kiisalu taakkuninnga nakkutilliinermut ilaatinneqartut pillugit paasissutissat, oqartussaasut suliarinninnerannut pisariaqartinneqartut tamaasa, takornariartitsinermik ingerlataqarnissamut akuersissummik qinnuteqartut takornarialerisullu nalunaarutigissavaat.

Imm. 2. Naatsorsueqqissaarnermut siunertat anguniarlugit, imm. 1 malillugu paasissutissat kinaassutsimik ilisarsisinnaajunnaarsillugit, pisortat oqartussaasuinut aamma ingerlatseqatigiiffiit namminersorlutik oqartussanit pigineqartunut Naalakkersuisut avitseqatigiissutigisinnaavaat.

Imm. 3. Imm. 1 malillugu akuersissutit pillugit takornariartitsinermik ingerlataqarnissamut aaqqissuussinerup suliassiissutigineqarnissaa siunertaralugu, pisortani oqartussaasunut imaluunniit ingerlatseqatigiiffiit namminersorlutik oqartussanit pigineqartunut, § 6, imm. 1 malillugu Naalakkersuisut pisussaaffiit pisinnaatitaanerillu tiguisimasunut, paasissutissat Naalakkersuisut avitseqatigiissutigisinnaavaat.

§ 5. Kalaallit Nunaanni takornariartitsinermik ingerlataqarnissamut akuersissutit atulersinneqarnerannut piumasagaatit ingerlatseriaatsillu pillugit malitarsissat erseqqinnerusut Naalakkersuisut aalajangersarsinnaavaat, matumani takornarialerisut nalunaarusiornissamik pisussaaffii aamma paasissutissat allat nalunaarutiginneqarnissaannut piumasagaatit pillugit.

§ 6. § 3 malillugu takornariartitsinermikingerlataqarnissamut , § 13 malillugu nakkutilliinissamut, § 14, imm. 1 malillugu naalakkiummik nalunaaruteqarnissamut, kiisalu § 14, imm. 2 malillugu takornariartitsinermik ingerlataqartunut akuersissutit utertinneqarneranut atatillugu aamma piginnaatitaanerit pillugit pisussaaffitsik, ingerlatseqatigiiffimmut namminersorlutik oqartussanit pigineqartumut imaluunniit kommunalbestyrelsimut ataatsimut Naalakkersuisut tunniussinavaat.

Imm. 2. Ingerlatseqatigiiffik namminersorlutik oqartussanit pigineqartoq imaluunniit kommunalbestyrelse ataaseq, imm. 1 malillugu pisussaaffinnik pisinnaatitaanernillu tunineqartoq, pisussaaffinnut pisinnaatitaanernullu taakkuninnga atasumik inatsisini ingerlatsinermut tunngasuni malitarsissanut tunngavinnullu, Kalaallit Nunaanni Namminersorlutik Oqartussat ataanni pisortat ingerlatsineranni atuuttunut ilaatinneqassapput, matumani pisortat ingerlatsineranni suliassat suliarineqartarnerat pillugu Inatsisartut inatsisaat aamma inunnik paasissutissanik suliarinnittarneq pillugu inatsit ilanngullugit.

Imm. 3. Pisuni pisussaaffiit pisinnaatitaanerillu ingerlatseqatigiiffimmut namminersorlutik oqartussanit pigineqartumut imaluunniit kommunalbestyrelsimut ataatsimut tunniunneqarneranni, nakkutilliineq pillugu kiisalu naammagittaalliorsinnaaneq pillugu Naalakkersuisut malitarsissanik erseqqinnerusunik aalajangersaasinnapput.

Kapitali 3

Pisinnaatitaaffinnik piginnittut

§ 7. Takornariartitsinermik ingerlatsisinnaanermut akuersissut taamaallaat tunniunneqarsinnaavoq inummumut:

- 1) Kalaallit Nunaanni inuit allattorsimaffianni nalunaarsugaasimasumut.
- 2) Kalaallit Nunaannut tamakkiisumik akileraartussaataasumut, aamma
- 3) nammineq pisuussutiminik tamakkiisumik atuisinnaasumut aamma akiliisinnaajunnaarneq-, akiliisinnaannginneq- imaluunniit atorunnaarsitsineq pillugit suliaqarfigineqanngitsumut.

§ 8. Inatsisitigut pisinnaatitaasumut pisussaataasumullu takornariartitsinermik ingerlataqarnissamut akuersissut taamaallaat nalunaarutigineqarsinnaavoq ukununga:

- 1) aningaasaatileqatigiiffimmumut imaluunniit inuup ingerlatseqatigiiffianut Kalaallit Nunaanni angerlarsimaffeqartumut,
- 2) akiliisinnaajunnaanermik, akiliisinnaannginnermik imaluunniit atorunnaarsitsinissaq pillugit suliaqarfigineqanngitsumut,
- 3) aningaasaatileqatigiiffiup aningaasaataasa minnerpaamik 2/3-ii inunnit § 7, nr. 1- 3-mi piumasagaatinik naammassinnittunit toqqaannartumik toqqaannanngitsumilluunniit pigineqarpata,
- 4) aningaasaatileqatigiiffimmi taasisinnaatitaanermut piginnaatitaaffiit minnerpaamik 2/3-ii toqqaannartumik toqqaannanngitsumilluunniit inunnit, § 7, nr. 1-3-mi piumasagaatinik naammassinnittunit, pigineqarpata, aamma
- 5) inuup ingerlatseqatigiiffiani peqataasut minnerpaamik 2/3-ii § 7, nr. 1-3-mi piumasagaatinik naammassinnippata.

Kapitali 4

Isumannaallisaanermut pilersaarutit

§ 9. Sullissinernut inatsisartut inatsisaanni matumani ilaatinneqartunut, aamma qinnuteqartup tuniniassallugit eqqarsaatigisaanut, takornariartitsinermik ingerlataqarnissamut akuersissummik qinnuteqartut, allaganngorlugu isumannaallisaanermut pilersaarummik suliaqassapput.

Imm. 2. Isumannaallisaanermut pilersaarut qaqugukkulluunniit kalaallisut tuluttullu takornarianit tikiinneqarsinnaassaaq.

Imm. 3. Isumannaallisaanermut pilersaarut ajutoorutaasinnaasunik nalilersuineramik aamma upalungaarsimanissamut pilersaarummik katitigaassaaq aamma nutarterneqarsimassaaq.

Imm. 4. Pissutsit navianarsinnaasut pingaaruteqarnerpaat, suliniummut inatsisartut inatsisaanni matumani ilaatinneqartumut atassuteqartut pillugit, ajutooratarsinnaanermik nalilersuineq erseqqissumik annertuumillu paasissutissanik takornarianut ilisimasaqalersitsinissamut naleqquttuussaaq. Suliniutip piareersarneqarnerani ajutoorutaasinnaasunik nalilersuineq sulisut

toqqarneqarneranni tungaviussaaq, matumani angalanermi siulersuisut, angalanermi piffissaliussaq, pissutsit avataanersut nalilersorneqarneranni, atortussat toqqarneqarneranni il.il.

Imm. 5. Upalungaarsimanissamut pilersaarut ajutoorutaasinnaasunik nalilersuinermik tungaveqassaaq aamma tulliuuttunik imaqaassalluni:

- 1) annakannajaartoqartillugu imaluunniit ajunaarnermik pisoqartillugu iliuusissat aalajangerneqartussat allaaserineqarnerat,
- 2) sulisuni ingerlataqarnermi peqataasuni ilisimasassat, misilittagaqarnissaq aamma pisinnaasaqarnerit pillugit paasissutissat, aamma
- 3) qinnuteqartup sulisuisa navianartumik pisoqartillugu qanoq qisuariaateqarnissaat pillugit, matumani attaveqaqatigiinnerup eqqarsaatigineqarnera ilanngullugu, paasissutissat.

Imm. 6. Pisuni inatsisiliornerit allat imaluunniit aalajangersimasumik sulisaatsit, suliniutip pineqartup suliarineqarneranut atasumik isumannaallisaanermut piumasaqaatinik malittarisassiussisut, aamma qinnuteqartup eqqortissallugit pisussaaffigisai, atuutsillugit, imm. 1-miit 5 ilanngullugu aalajangersakkaniittut atuutinngillat.

Kapitali 5

Sillimasiinermi matussusiineq aamma allatut qularnaveeqqusiineq

§ 10. Takornariartitsinermik ingerlataqarneq inatsisartut inatsisaanni matumani ilaatinneqartoq inuussutissarsiornermi akisussaanermut sillimaserneqarsimassaaq imaluunniit allatut qularnaveeqquserneqarsimassaaq.

Imm. 2. Pisuni, takornarialerinerimik ingerlataqarnerup suussusaani tassani matussusiisussamik inuussutissarsiornermi akisussaanermut sillimasiisinnaaneq periarfissaatinnagu, aammattaaq qularnaveeqqusiinissaq alla periarfissaatinnagu, imm. 1 atuutinngilaq.

Imm. 3. Imm. 1 malillugu sillimasiinermi matussuserneqarnissamut aamma qularnaveeqqusiinissamut piumasaqaatit pillugit Naalakkersuisut malittarisassanik erseqqinnerusunik aalajangersaasinnaapput.

Kapitel 6

Immikkut ittumik akuersissutit

§ 11. Pisuni immikkut ittuni §§ 7-imiit 10 ilanngullugu aalajangersakkanit aamma inatsisartut inatsisaanni matumani § 3, imm. 4-p, § 5-ip, § 6, imm. 3-p, § 10, imm. 3-p aamma § 15-ip malitsigisaannik aalajangersakkanit aalajangersarneqartunit, piumasaqaatinit Naalakkersuisut immikkut ittumik akuersissuteqarsinnaapput.

Kapitali 7

Akiliutit

§ 12. § 3, imm. 2 malillugu takornarialerinemik ingerlataqarnissamut akuersissummik qinnuteqartunit kiisalu oqartussaasut suliarinnerannut atasumik aningaasartuutitut takornarialerisunit Naalakkersuisut akiliummik akileeqqusisinnaapput.

Imm. 2. Imm. 1 malillugu akiliutit akilerneqarnissaat pillugit malittarisassanik erseqqinnerusunik Naalakkersuisut aalajangersaasinnaapput.

Kapitali 8

Nakkutilliineq, peqqussuteqarneq aamma takornarialerinemik ingerlataqarnissamut akuersissutip utertinneqarnera

§ 13. Inatsisartut inatsisaannik malittarisassanilu inatsisartut inatsisaata massuma malitsigisaannik takornarialerisut il.il. eqqortitsinerat Naalakkersuisut nakkutigissavaat.

§ 14. Inatsisartut inatsisaata aamma inatsisartut inatsisaat manna malillugu malittarisassat aalajangersarneqartut malinneqarnissaanikpeqqussuteqarneq , Naalakkersuisut takornarialerisunut il.il. nalunaaruteqarsinnaapput.

Imm. 2. Takornarialerisoq inatsisartut inatsisaat malillugu peqqussummik naammassinninngippat, takornarialerinemik ingerlataqarnissamut akuersissut inatsisartut inatsisaat manna malillugu atulersinneqartoq Naalakkersuisut utertissinnaavaat.

Kapitali 9

Inuussutissarsiutigalugu sulinermut zonenut immikkoortiterineq il.il aamma sumiiffiit ilaanni atuisinnaatitaanermut killiliineq

§ 15. Sumiiffiit ilaanni atuisinnaanermut killiliineq, aamma inuussutissarsiutigalugu ingerlataqarneq taamaallaat sumiiffinni erseqqinnerusumik aalajangerneqartuni, piffissani erseqqinnerusumik aalajangerneqartuni imaluunniit piumasaqaatit immikkut ittut eqqortinneqarnerisigut pisinnaaneri pillugit, malittarisassanik erseqqinnerusunik Naalakkersuisut aalajangersaasinnaapput.

Kapitali 10

Pineqaatissiinerit

§ 16. Inummut tulliuttunik iliuuseqartumut Kalaallit Nunaanni Pinerluttulerineri inatsimmi malittarisassat malillugit akiliisitsissummik akiliisitaasussanngortitsisoqarsinnaavoq:

- 1) § 3, imm. 1 malillugu takornariartitsinerimik ingerlataqarnissamut akuersissummik atuuttumik peqarani takornariartitsinerimik ingerlataqartumut ,
- 2) § 4, imm. 1 malillugu oqartussaasut il.il. pisassaannik paasissutissanik eqqunngitsunik imaluunniit salloqittaataasunik nalunaaruteqartumut imaluunniit paasissutissanik nipangiussisumut.
- 3) § 14, imm. 1 malillugu naalakkiummik naammassinninngitsumut.

Imm. 2. Inatsisartut inatsisaat imaluunniit inatsisartut inatsisaat manna malillugu malitassat atulersinneqartut akiliisitsissummik aalajangiisoqarnissaa periarfissaliissutigineqartillugu, akiliisitsissut Kalaallit Nunaanni pinerluttulerinermi inatsimmi malittarisassat malillugit inatsisitigut pisinnaatitaasumut pisussaataasumullu naalakkiutigineqarsinnaavoq.

Imm. 3. § 5, § 10, imm. 3, aamma § 15 malillugit malitassani atulersinneqartuni, Kalaallit Nunaanni pinerluttulerinermi inatsimmi malittarisassat malillugit pineqaatissiinerit akiliisitsissutitut ilusillit aalajangersarneqarsinnaapput.

Imm. 4. Inatsisartut inatsisaata imaluunniit inatsit malillugu malittarisassat aalajangersarneqartut unioqqutinneqarnerani, Kalaallit Nunaanni pinerluttulerinermi inatsimmi malittarisassat malillugit arsaarinnittoqarsinnaavoq. Arsaarinninneq nunatta karsianut iluanaarutitut pissaaq.

Imm. 5. Akiliisitsissutit, inatsisartut inatsisaat manna imaluunniit inatsisartut inatsisaat manna malillugu malittarisassat aalajangersarneqartut malillugit akiliisitaasussanngortitaasut, nunatta karsiata pissavai.

Kapitali 11

Eqqartuussivilersuussisinnaaneq

§ 17. Pissutsit inatsisartut inatsisaanni ilaatinneqartut pillugit aalajangiineq, aalajangiinerup akuusumut nalunaarutigineqarnerata kingorna qaammatit 6 piffissaliunneqartut iluanni eqqartuussivinnut saqqummiunneqarsinnaavoq.

Imm. 2. Suliat inatsisartut inatsisaanni ilaatinneqartut, Nunatsinni Eqqartuussivimmut suliarinneqqaarfittut saqqummiunneqassapput.

Imm. 3. Naalakkersuisut allatut aalajangiisimatinnagit, aalajangiinerup eqqartuussivinnut saqqummiunneqarnera aalajangiinerup naammassineqarnissaata kinguartinneqarnissaanik kinguneqanngilaq.

Kapitali 12

Atuutilersitsinermut- ikaarsaariartitsinermullu aalajangersakkat

§ 18. Inatsisartut inatsisaat ulloq 1. januar 2025 atuutilissaaq.

Imm. 2. Takornariartitsinermik ingerlataqartunut , piffissami inatsisartut inatsisaata atuutilernissaa sioqqutitsiarlugu inatsisit malillugit suliarineqartunut, inatsisartut inatsisaat 1. januar 2027 ilanngullugu atuutinngilaq.”

Siunnersuummut oqaaseqaatit

Oqaaseqaatit nalinginnaasut

Inatsisartut inatsisaata kalaallisoortaata qallunaatoortaatalu akornanni oqaatsitigut naapertuuttoqarnissaata qulakkeerneqarnissaa allannguutissatut siunnersuutip qulakkiissallugu siunertaraa.

Tamatuma saniatigut 2/3-inik piginnittuunissaq pillugu siusinnerusukkut piunasaqaat, missingiummi siusinnerusukkut tusarniaassutigalugu nassiunneqartumi allassimasoq, ilanngunneqarpoq. Ingerlatseqatigiiffiit piunasaqaatit nutaat naammassiniarlugit piginnittoqarnerminni nakkutiginninnerminnilu ilusiligaanertik allanngortitsisariaqalernerannik, allannguut malitseqarsinnaavoq.

Naggasiutigalugu akiliisitsinissamut aalajangersagaq allanngortinneqarpoq, taamaalilluni annikitsumik mianersuaalliorneq akiliisitsinermik pineqaatissiivigineqarsinnaalerluni.

Inatsisissatut siunnersuummi aalajangersakkanut ataasiakkaanut oqaaseqaatit

Nr. 1-imut

Allannguutissatut siunnersuummi oqaaseqaatit nalinginnaasut innersuussutigineqarput.

Nr. 2-imut

Allannguutissatut siunnersuummi oqaaseqaatit nalinginnaasut innersuussutigineqarput.